

KERATAN AKHBAR

TARIKH : 8 DISEMBER 2022
AKHBAR : BERITA HARIAN
MUKA SURAT : 20

Malaysia mungkin tak berdepan kemelesetan



Malaysia mungkin tak berdepan kemelesetan

Malaysia tidak akan berdepan kemelesetan ekonomi tahun depan, namun terkesan menerusi pertumbuhan lebih perlahan berikutan jangkaan kegawatan ekonomi Amerika Syarikat (AS), demikian kata MIDF Research.

Pengarah dan Ketua MIDF Research, Imran Yassin Md Yusof, berkata pihaknya yakin ekonomi negara akan dapat mengharungi ketidakpastian pada 2023 disokong permintaan domestik yang kukuh.

Beliau berkata, jika ekonomi AS meleset, ia akan menjejaskan prestasi perdagangan negara, namun permintaan domestik menyokong pertumbuhan ekonomi tempatan.

"MIDF Research menjangkakan pertumbuhan Keluaran Dalam Negara Kasar (KDNK) Malaysia berada pada kadar sederhana 4.2 peratus untuk 2023 berbanding unjuran pertumbuhan kami bagi tahun ini 8 peratus.

"Kami jangka permintaan domestik akan memberi sokongan kepada ekonomi didorong perbelanjaan pengguna yang berterusan, tekanan harga sederhana, peningkatan dalam aktiviti berkaitan pelancongan dan kemungkinan pemuliharaan projek infrastruktur," katanya.

Beliau berkata demikian pada taklimat media mengenai tinjauan pasaran 2023 di Kuala Lumpur semalam.

Ekonomi Malaysia berkembang kukuh 14.2 peratus pada suku ketiga 2022 dan 9.3 peratus bagi sembilan bulan tahun ini, disokong permintaan domestik berterusan, pasaran pekerjaan kukuh dan permintaan luaran yang kukuh.

Pertumbuhan lebih baik

Pertumbuhan itu lebih baik berbanding suku kedua 2022 yang mencatatkan pertumbuhan 8.9 peratus dan lebih kukuh berbanding 5 peratus suku pertama 2022.

Mengenai paras hutang negara, Ahli Ekonomi MIDF Research, Abdul Muiz Morhalim, berkata dari segi nisbah hutang negara kepada KDNK dijangka bertambah baik sejajar dengan jangkaan ekonomi negara kekal berkembang secara positif.

Beliau berkata, kemungkinan defisit fiskal masih berlaku, justeru pergantungan kepada pinjaman akan berterusan dan hutang dijangka pada paras RMI.3 trilion.

Namun, katanya, dari segi nisbah hutang kepada KDNK, ia dijangka menurun sejajar dengan jangkaan pertumbuhan ekonomi positif.